

Iwarakha wa Aebraniya

Malhove o uholhelha

Iwarakha wa Aebraniya phi iwarakha yo uhelha nrima inomwooniha Yesu atimirihaka malhove e inamilhohi aahimiye ni Malhehano o Khalhayi. Yelha iwarakha ilha yaalhepiye thoko mahubiri nhina mwaya akhalhaka malhove anopwaha 60 anohimiacha mwaha uri nhina Malhehano o Khalhayi a Aebraniya, anooniha mwaari Yesu chenre awe wo utimiriha malhove o unamilhohi ni mitheko cha Opochera ishaani Olhupalhe a Ayahudi. Wo yoyo nlhatu uyo etu, iwarakha ilha yaalhakelhiye wiira yaahelhe mirima Ayahudi o nlhoko wa attu anrumelhenlhe Kuristo. Tho, iwarakha wa Aebraniya inomwooniha Yesu chenre awe wo utimiriha Malhehero ni waapanga oPOCHERA ishaani ahipange tho ntheko wo ukumiha isadaka mahuku o uhimalha. Yesu phi aari ishaani yo ulhivelhelhiya milhatu chonkhaye cho uwonya, isadaka yo nkwhaha mmoka, yo ulhivelhelhiha mahuku onkhaye. Paahi attu anrumelhenlhe Kuristo o alha mahuku ihu alha, ni ayo anoopatta malhove o uhelhiya nrima nhina iwarakha wa Aebraniya ilha, wiira yoorie unttwara Yesu Kuristo ukhalha phi ntu nohalha unooriha unrumelhelha Nlhuku, ni uthepa unrumelhelha Yesu mwanene (nlhako wo 12:2).

Khaawo ata ntu mmoka nochuwelha mpani lhepilhe iwarakha wa Aebraniya ilha, nansho

attu oshoma ahohimia nlhove no waaronmolha Napaolo, ashinna Luka ama Nabanaba. Mahuku ilhepiye aya ni ayo khanochuwania nansho attu enchi anorumelhelha wiira yaalhepiye ihinaaya iyaakha yo 70 baada yo uyaria wa Kuristo. Iwani yo Uyerusalemu yaatanganyie iyaakha 70 baada yo uyaria wa Kuristo, nansho ata inakhalhaka chiicho, ntu lhepilhe ikitabu ilha noromolha chittu thoko iwani iyo ihinaaya utanganyiya. Iwarakha wa Aebraniya ilha yaalhepiye wi iwani ya Arumi (nlhako wo 13:24) nkayaakawiya mmilhokoni mwa attu yanrumelhenhe Kuristo.

Chiri nhina

Ntu lhepilhe iwarakha noomwooniha Yesu chinre awe wo ukhalha phi mulhupalhe mmilhokoni mwa anamilhoji a Nlhuku ni wa minepa o wiirimu (nlhako wo 1:1-4:13).

Tho noothepa wooniha wiira Yesu phi mulhupalhe mmilhokoni mwa opochera ishaani anovara nthekeo mwi Inupa ya Nlhuku Uyerusalemu (nlhako wo 4:14-7:28).

Tho, nthekeo wa Yesu phi mulhupalhe nhina Malhehano o Khalhayi Nlhuku aapannge awe ni attu awe wo iphiro yo Malhehero yanvanhe awe ashinna Musa (nlhako wo 8:1-10:31).

Vanomalhiha awe uhimiacha wiira Yesu phi mulhupalhe wo kila ittu, ntu lhepilhe iwarakha uyo nookumiha ikano cho uvarechesha (nlhako wo 10:32-13:17).

Wo umalhihera, ntu lhepilhe iwarakha uyo, noomalhiha iwarakha awe iyo wo uhimiacha malhove o uhelhana nrima ni waavaha attu isalamu (nlhako wo 13:18-25).

*Nlhuku hoolhumacha wo iphiro yo
Mwaamwanawe*

¹ Khalhayi vawo Nlhuku ahoolhumacha ni manyaapwiya ihu venchi wo iphiro chinchi ni wo iphiro ya anamilhohi awe, ² nansho alha mahuku ammalhelha alha honulhumacha ni hii wo iphiro yo Mwaamwanawe, nthanlhe awe wiira chittu chonkhaye chikhalhe chawawe. Ni wo iphiro yo yoyo Nlhuku ahoopa irimu ni ilhapo ni chittu chonkhaye chiriwo.

³ Mwaana phi waaria wo nthimicho wa Nlhuku, alhikaanaka ni Nlhuku mwanene, avarel-haka chittu chonkhaye wo nlhove nawe no machiri. Vamalhinhe awe unihapiha uwonya wihi, hokhalha vano wiirimu wiimonono wa Nlhuku o ikuru.

Ipilhi yo Mwaana a Nlhuku

⁴ Paahi etu Mwaana phiri ni ipilhi yulhupalhe waapwaha minepa o wiirimu, thoko nchina vahiyehi awe ni Nlhuku chiri aya nulhupalhe up-waha machina aya. ⁵ Ukhalhawayaya Nlhuku kha-neera mena ata wo nnepa wo wiirimu mmoka uriyoothe wiira,

“Uweva phi Mwaamwanaka,
Lhelho, kinoolhumacha onkhaye achuwelhe wi-
ira, Mii phi Athumwana.”

Ni vavawo khanoohlhumacha wiira,
“Mii kinookhalha phi Athumwanawe,
Ni uyo nookhalha Mwaamwanaka.”

⁶ Ni vavawo etu Nlhuku vanonruma awe Mwaana awe o ntara velhaponi, neera,
“Minepa a Nlhuku onkhaye anthimicheke yoyo.”

⁷ Nansho wo minepa o wiirimu Nlhuku enre,

“Haapanga minepa awe ukhalha iphioo.
 Ni akarumiya awe ukhalha malhimi o mooro.”

⁸ Nansho wo Mwaamwanawe enre,
 “Inyu Apwiiya Nlhuku, Ihiche inyu ye Imwene,
 phi yo mahuku o uhimalha.
 Ikopo inyu phi naatawara attu inyu we ikekhi-
 aye.

⁹ Inyuva nhottuna mitheko cho ikekhiaye,
 nhovenga iphiro cho uwonya.
 Phi wo yoyo nlhatu uyo etu, Nlhuku, Nlhuku
 inyu,
 ahoohikani makhura o ipilhi yuulhupalhe waap-
 waha akavihi ashikhunanyu,
 nkamwaattapelhelha chinene.”

¹⁰ Tho aheera,
 “Inyu Thithi vaachokhonlhe inyu, mwahoupa
 ilhapo,
 Ni irimu ni iyo phi ntheke wo miono chinyu.

¹¹ Chonkhaye chiyo chinoovira, nansho inyu
 nnoolhokelha mahuku o uhimalha.
 Chittu chonkhaye chinoothalha thoko ikuwo.

¹² Nnoovilhikacha thoko ngolole,
 Chinoopitingushachiya thoko ngolole chiicho.
 Nansho inyuva phi yalhe alhe mahuku o uhi-
 malha,
 Ulhokelha winyu khunomalha.”

¹³ Nlhuku khaamwirenlhe ata nnepa wo wiirimu
 awe mmoka wiira,
 “Ukhalheke wiimonono waka,
 Mpaka vanohalha aka waathalha amalhaponi
 inyu wuuthi inyaa chinyu,
 Wiira mwaanyikalhelhe.”

14 Chani minepa ayo phi apani? Yayo phi minepa anorumiya ni Nlhuku waakavihera alhe anohalha woopolhiya alhe.

2

Noopo mulhupalhe

1 Wo chiichammo etu nivarechesheke rata malhove niiwilhe ihu ayo, ahiwe vakani vakani aapotera. **2** Ukhahawaya ntenga waahimiye wo iphiro yo minepa ulhe waahonia ukhalha we ikekhhene. Ntu riyothe ahaatwanre ama ahaarumelhenlhe aholhiviya we ikekhiaye thoko champhwanenlhe awe. **3** Paahi etu ninohalha ukulhuphuwa chani naahinlhohehe noopo mulhupalhe thoko yolha? Athithi anene phi anhimianche yoyo noopo uyo ni alhe yeewilhe alhe ahonihimiechesha wiira yaari ikekhhene. **4** Nlhuku ni uyo ahohimiechesha wo mitheko cho ushangiha ni ithikineha chinchi ni waakawelha mahalha o Iphumu awe attu wo uthanana wawe.

Yesu phi Nholhelhi o unooponi

5 Nlhuku khanaavaha minepa ikuru yo utawara ilhapo inowa inohimiacha ihu iyo.

6 Tho, Malhove Matakatifu ahohimiechesha vakittu wiira,

“Ntu phi ishiyani mpaka mmupuwelhe,
Ntu phi mpani mpaka munlhohe?

7 Nhonyeviha vakani apwahiyaka ni minepa,
Nhommwariha mphumburu wo nthimicho wo
utawara chittu chonkhaye chuupilhe inyu,

8 Nhommaha ikuru vachulhu chittu chonkhaye.”

Vanohimiya aya wiira, Nlhuku hommaha ntu ikuru yo utawara chittu chonkhaye wo uhihal-hiha ata ittu imoka. Nansho vano khaninoona wiira ntu hovahiya ikuru yo utawara chittu chonkhaye.⁹ Nansho ninoomwona Yesu aayevi-hiye kuliko minepa wo ikatema ikani, vano athimichiyaka ni uwarihiya mphumburu ukhal-hawaya wo nnema wa Nlhuku ahotwaruwa mpaka ukhwa wo nlhatu wa attu onkhaye.¹⁰ Ukhalhawaya yahophwanelha wiira Nlhuku noopa ni ushunga kila ittu, anratihe Yesu wo iphiro yo utwarushiya, wiira aawihe ashaana enchi u nthimichoni wa Nlhuku. Ukhalhawaya Yesu phi noopo a attu onkhaye.

¹¹ Yoyo phi naahapiha attu uwonya waya. Ni uyo phiri vamoka ni ayo atakatifu ateelhihiye ayo, onkhaye ayo Athumwanaya amoka. Phi nlhatu etu khanoona ishoni weehana yayo attu ayo, ashilhoko awe, ¹² thoko chineera awe, “Kinowaahimeria ashilhoko aka nchina ninyu. Kinowiipelhani ichipo cho utotopelhani vanoth-othokana aya attu anourumelhelhani.”

¹³ Uno eeraka tho,
“Kinonrumelhelha Nlhuku.”

Nkeera tho,

“Mwooneke, Mii kirii va, vamoka ni attu aki-vanhe awe Nlhuku akhalhe achishaana aka.”

¹⁴ Paahi ukhalhawaya ashaana ahokaviha mu iphome ni iruttu, Yesu ni uyo chiicho ahokhalha thoko ayo. Ikhalhe wo ukhwa wawe ammul-hushe Nakare nonvarelha nookhwa, ¹⁵ ni we-wananiha alhe anomwoova nookhwa alhe, aari mpottani ukumi aya wonkhaye. ¹⁶ Ukhalhawaya

we ikekhiaye khaawilhe waakaviha minepa mitheko chaya, nansho aawilhe waakaviha ashaana a Aburahimu. ¹⁷ Wo yevo iphiro iyo etu aheelhikaaniha thoko chirri aya ashilhoko awe ayo, akhalhe Opochera ishaani olhupalhe aya, o ukhulhuvelhiya, o ikiriri munthekoni wa Nlhuku, wiira uwonya wa attu ulhevvelhelhiye. ¹⁸ Ukhalhawaya ni uyo ahovilhelha utwarushiya ni ulhikachiya, vano etu nowooria waavaha machiri attu onkhaye anolhikachiya ni utwarushiya.

3

Yesu phi mulhupalhe waapwaha ashinna Musa

¹ Paahi etu ashilhoko aka, attu a Nlhuku nnomiana mahalha o wiirimu, mmuupuwelheke chinene Yesu, Karumiya a Nlhuku ni Opochera ishaani olhupalhe mu nrimani nnotwara ihu. ² Yoyo aari o ukhulhuvelhiya ni Nlhuku anthanlhe uvvara ntheke awe, thoko ashinna Musa vaavara aya ntheke u Inupa ya Nlhuku, attu o Israeli. ³ Nansho, Yesu phi nophwanelhiya upatta nthimicho chinene waapwaha ashinna Musa ayo, thoko ntu notheka inupa vanohelhelhiya awe chinene upwaha inupa inene iyo. ⁴ Eiyo, ukhahawaya kila inupa inothekiya ni ntu, nansho Nlhuku phi thenke chittu chonkhaye. ⁵ Ashinna Musa yaari karumiya o ukhulhuvelhiya mu inupa yonkhaye ya Nlhuku. Ni ntheke aya uyo wahohimiechesha chittu Nlhuku chinowa awe uhimia kaanyuma, ⁶ nansho Kuristo yoyo phi o ukhulhuvelhiya

thoko Mwaana neemelhelha Inupa ya Nlhuku, irii phi hii va, nathepaka uvarelhelha chinene mirima chihu ni nikhulhuvelho nineefunelha ihm.

Nlhuku nowa wettuwiha attu awe

- ⁷ Paahi etu, thoko Iphumu ya Nlhuku chinohimia aya mu Malhove Matakatifu, “Mweewakaru nlhove na Nlhuku lhelho,
- ⁸ Nhilhipihe mirima chinyu thoko cheera aya manyaapwiiya inyu,
Vaakhonte aya umwiiwelhelha Nlhuku,
Nihuku nanlhikanche aya Nlhuku, vaari aya uthakoni nne.
- ⁹ Wowo manyaapwiiya inyu yahokiphima ni ukilhikacha,
Inakhalhaka yahochuwelha chittu chonkhaye chaapangelha aka wo iyaakha makhumi ncheshe.
- ¹⁰ Ni mii kahaathunanelha yayo manyaattu ayo keeraka,
‘Mahuku onkhaye, yayo attu ayo anotwaracha iphiro chaya,
Mena khachuwenlhe mirima chaya.’
- ¹¹ Paahi kahorushiya, nkakaalhupelha kiiraka,
‘Khannophiya mena unipuroni waka wo wiit-tuwelha!’ ”
- ¹² Paahi etu ashilhoko aka, mwiishungeke rata, hiwe aakhalha mmoka inyu o nrima wo uhilhoka wo uvaanyiha, nkaarukunuwa nkanhiya Nlhuku nkumi. ¹³ Nansho vanothepa inyu wiiwa nna nlhove nna, “Lhelho,” nishomiyaka nhina Malhove Matakatifu, mwaamukaneke kila nihuku. Hikhalhe ntu riyoothe munlhokoni mwinyu o

uvaanyiha wo nlhatu no uthepiachiya nkaawulhuwa mu uwonyani. ¹⁴ Ukhalhawayaa hii onkhaye vaa ninokavihana ni Kuristo Moopolhi, nashungereraka rata nrima nivarenlhe ihu toka machokholhelho.

¹⁵ Muupuwelheke Malhove Matakatifu vanneera aya,

“Mweewakaru nlhove na Nlhuku lhelho,
Nhilhipihe mirima chinyu thoko chenre aya
manyapwiya inyu vaakhonte aya umwiwelhelha Nlhuku.”

¹⁶ Ukhalhawayaa phi apani yayo eewa nlhove na Nlhuku ni unkhota umwiwelhelha ayo? Kahii phi alhe onkhaye aaholhelhiye na ashinna Musa ukhuma Umisri alhe? ¹⁷ Nlhuku aathunalhenlhe apani etu iyaakha makhumi ncheshe ayo? Kahii phi alhe aawonyilhe nkaakhwa ni iruttu chaya nkachaawanelha uthakoni alhe?

¹⁸ Thothoni, phi apani Nlhuku aalhupenlhe awe wiira khanowa mena aphiyaka u nipuroni waya wo wiittuwelha? Kahii phi alhe aakhonte unrumelhelha Nlhuku alhe? ¹⁹ Paahi etu ninoona wiira khayoonrie uphiya unipuroni wo wiittuwelha wo nlhatu wo ukhota waya urumelhelha.

4

¹ Paahi ukhahawayaa nihaawo nlhove no ulhehiya wiira niphie unipuro no wiittuwelha, niichinanelheke etu, hikhalhe mmoka inyu nohalha uhaphiya wowo. ² Ukhahawayaa ni hii niheewa Malhove Orera thoko aahimeriye aya yayo manyattu ayo. Nansho nlhove

neewilhe aya nno khanaalhonke ittu, ukhalhawaya khayaapochenre nrima thoko attu yeewelhenlhe alhe.³ Ni vano hii ninorumelhelhava, ninoopatta nenko nipuro no wiittuwelha nno. Nenko phi nipuro no wiittuwelha nilhenhe awe Nlhuku venre awe,
 “Paahi kahorushiya, nkakaalhupelha wiira,
 ‘Khanowa mena aaphiya unipuroni waka wo wiittuwelha!’”

Inakhalhaka wiira mitheko chawe chaari chinamanlhe toka vo upiye aya ilhapo.⁴ Ukhahawaya Malhove Orera ahohimia vakittu wiira, Nlhuku aheettuwa nihuku no saba, nkaahiya uvara mitheko chawe chonkhaye.⁵ Tho, Malhove Orera anohimia wiira, “Khanophiya unipuroni waka wo wiittuwelha weeshenre aka uwo.”⁶ Wo chiichammo etu, nihaawo nipesha wa attu akina anohalha uphiya unipuroni wo wiittuwelha uwo. Ukhahawaya, ayo yaachokhonlhe wiiwa Malhove Orera ayo vaahimiachiya aya, khayonrie uphiya wowo wo nlhatu wo uhirumelhelhaway.⁷ Vavawo tho Nlhuku aheesha nihuku nikina nineehaniya “Lhelho” naahimiye toka khalhayi wo iphiro ya Adaudi wiira,
 “Mweewakaru nlhove na Nlhuku lhelho,
 Nhilhipihe mirima chinyu.”

⁸ Ukhahawaya ikaari Nayoshua ahaavaha attu nipuro no wiittuwa nno, Nlhuku kholhumachera nihuku nikina tho.⁹ Paahi etu nihaawo Nihuku no Wiittuwa nenshe awe Nlhuku wa attu awe, thoko Nlhuku cheettuwilhe awe nihuku no saba.¹⁰ Ukhahawaya kila ntu neetuwa wowo ulhenhe awe Nlhuku uwo homalhiha mitheko chawe thoko Nlhuku chenre awe

wo wiittuwa munthekoni mwawe. ¹¹ Paahi etu mwaatti niilhipiheke ni hii niwe naapatta nipuro no wiittuwelha nno, hikhalhe ata mmoka ihm nohalha woochelha thoko hummanyattu aakhonte umwiwelhelha Nlhuku alhe.

¹² Ukhalhawaya Nlhove na Nlhuku nikumi, no machiri, no wiithia, ninohoma mpaka nhina minepa ni mirima chihu thoko uphangwa wo wiithia unothikilha velhi uno ni uno ni umwalhaaniha vanokumaana itturi cho iruttu ni makhura. Tho ninowaalhuwa uchuwelha moopuwelho ni minikwa cho mirima cha attu. ¹³ Khiiwo ittu ihinochuwelhiya mmiholho wa Nlhuku. Chittu chonkhaye chihopatakulhiya chiru mwaari mmiholho wawe yoyo ninohalha ihm wiivaraanga uwannyawo uyo.

Yesu phi Opochera ishaani olhupalhe chinene

¹⁴ Paahi ukhalhawaya nihanaa Opochera ishaani olhupalhe kenlhe mpaka wiirimu, Yesu, Mwaana a Nlhuku, nivarelhelheke etu nrima unohimiacha ihm uyo. ¹⁵ Yoyo Opochera ishaani olhupalhe ihm uyo, honichuwelha uhiichooria wihi. Ukhalhawaya ni uyo mwanene uyo aholhikachiya wo kila iphiro thoko ni hii chineera ihm, nansho nkaakhalha wo uhiwonya. ¹⁶ Paahi etu, nichushererereke wo uhoova ihiye ye Imwene ya Nlhuku urii nnema, noonelhiye ikiriri nipatte nnema wo unikavihera vanokwana ihm.

5

¹ Kila Opochera ishaani olhupalhe nothanlhiya ni Nlhuku munlhokoni mwa attu, ni uvahiyamitheko cha Nlhuku cho waakavihera attu.

Ukumiha izawadi ni isadaka wo milhatu cho ulhevelhelhiya uwonya waya. ² Ukhahawaya ni uyo ntu, no uwonya thoko hii, nowooria waamukacha attu wo ikiriri attu, inakhalhaka khanchuwelha ittu, awonyaka. Ukhahawaya ni uyo ri o uhiichooria thoko ashikhunananawe ayo. ³ Wo yoyo nlhatu uyo etu, ni uyo mwanene uyo noothananiya kuhiwe upochera isadaka cha attu akina vekha ayaru, nansho wo nlhatu wo uwonya unowonya awe mwanene. ⁴ Khaawo ntu neethanlha mwanene ni wiivaha ipilhi yo ukhalha Opochera ishaani olhupalhe. Nlhuku phi nonthanlha kila mmoka ni umwiihana thoko chenre aya wo wihaniya Naharuni.

⁵ Chiicho etu, Kuristo Moopolhi kheevanhe mwanene nthimicho wo ukhalha Opochera ishaani olhupalhe, nansho Nlhuku mwanene phi nvanhe ni umwiirelha,

“Uweva phi mwaamwanaka,
Mii lhelho kineera, Mii phi Athumwana.”

⁶ Tho, vakittu vakina nhina Malhove Matakatifu, Nlhuku ahomwiirelha,

“Uweva phi opochera ishaani o mahuku o uhi-malha,

Thoko chaari aya wa opochera ishaani
Namelkisedeki.”

⁷ Yesu vaari awe velhaponi va ahonlha ni ukhuwelha vanhapelha awe Nlhuku, ooria umwoopolha nnookhwani. Ni ukhalhawaya aari ntu amwoova Nlhuku, Nlhuku ahomwi-welhelha. ⁸ Nansho inakhalhaka Yesu aari Mwaana a Nlhuku, aheettucha wiitimarikha wo uttwaruwa waatwarushiye awe. ⁹ Ni vavavo vaamalhihilhe awe ntheko waavahiye awe ni

Nlhuku, ahoratihiya ni ukhalha nlhatu wo machokholhelho o noopo o mahuku o uhimalha attu onkhaye anonrumelhelha. ¹⁰ Paahi etu Nlhuku ahonthanlha yoyo ukhalha Opochera ishaani olhupalhe mu nkutiro u Namelkisedeki.

Waamukiya uhiya iphiro cho uwonya

¹¹ Ahawo malhove menchi o uhimeriani anaacha yoyo mwaha uyo, nansho ahorika uhimeriani ukhalhawayaya mwaatti, attu o itiamaru. ¹² Ukhahawayaya mwaaphwanelhiye ni inyu mwaatti vano ukhalha o weettuchiha akhunaninyu, nansho ni inyu nthananiyaka wiittuchihiya tho malhove o upacha o Malhove a Nlhuku. Vano nhohokolhia tho utulhi, mwaamweke mapelhe ni uhiya ulhia yolhia yo ulhipa. ¹³ Ukhahawayaya nolhia mapelhe yoyo bado mwaana, khanonnuwa, khanachuwelha iphiro cho upanga chittu chinothanana awe Nlhuku. ¹⁴ Choolhia cho ulhipalhipa chinolhiya ni attu akhomanlhe, eettuchihiye nkayaachuwelha waanyulha mwoolhoka ni mu uwonyani.

6

¹ Paahi etu nihiyeke meettuchiho anaacha ntenga wa Kuristo, niweheke vano meettuchiho o ukhomalha. Nihiittuchihe tho meettuchiho o upacha o uhlhokalhoka anaacha ukhoroma ni unrumelhelha Nlhuku. ² Tho, meettuchiho o iphiro iphiro cho ubatiiziya ni o weesheriya miono ni uhhimushiya attu akhwilhe ni mwaha wo ihukumu yo mahuku o uhimalha. ³ Nlhuku anivaheraka, ninowa naapanga yayo.

⁴ Ukhalhawaya khinooria tho waahokolhosha wiira awe akhoroma attu amwalhelhiye ni ulhawiha mahalha o wiirimu yayo ni ashikhunanya, ni upangiya akavihi o Iphumu ya Nlhuku, ⁵ ni ulhawiha uchiva wo Nlhove na Nlhuku ni machiri o ikatema inowa, ⁶ nansho nkayaawulhuwacha mirima chaya kaanyuma, ahooriaka waahokolhosha ni ukhoroma tho. Yayo phi nokhalha aya thoko anonkhomelhelha tho Mwaana a Nlhuku vansalaabani ni umuulhhachiha muru vaattuni vahinohiya aya uwonya. ⁷ Ilapo inorupelhiya ipulha kila iyaakha ni umelhiha minyepu chinokhulhuvelha aya analhima, impatta ibarakha chinokhuma wa Nlhuku. ⁸ Nansho ilapo yamelhaka miri cho mi-iwa ni mahichi khirina nnema, inookholhaviya ni Nlhuku. Umalhelha waya unohalha ukhalha upahiya mooro wo mahuku o uhimalha.

⁹ Ashilhoko aka, inakhalhaka ninoolhumacha chiicho etu, ninokhulhuvelha wiira mwaatti nnoottwara iphiro yoombone, iphiro inokelha unooponi. ¹⁰ Nlhuku khanopanga chittu cho uhilhoka, khanolhiyalha uttuna unopanga inyu wo nchina nawe. Waalhoha ni waapochera attu anrumelhenlhe Kuristo ashikhunanyu yaawilhe uwaninyu ama anowa alha mahuku. ¹¹ Nnikwa ihu mulhupalhe uri umwoona kila mmoka inyu athepaka yoyo nrima wo uminda ni ikekhiaye uyo mpaka umalhelha waya, wiira ayo anokhulhuvelha ihu ayo atimire. ¹² Paahi etu mwaatti nhikhalhe attu o uhuva, nansho mwaatwariheke attu o upisha nrima ni attu o uvilhelha, mmwe mwaapochera mahalha alhe-

hilhe awe Nlhuku.

Nlhove na Nlhuku niri no Ikekheene

¹³ Nlhuku vaalhehilhe Aburahimu, aholhupelha wo nchina nawe upanga chilhenhe awe ukhalhawaya khaawo ri mulhupalhe nkina o umpwaha, paahi etu eromonlhe mwanene. ¹⁴ Enre, “We ikekhiaye kinouvahani ibarakha chinchi ni uvahani ashaana enchi.” ¹⁵ Aburahimu ahoweherera ni uvilhelha nkayaapochera nlhove naalhehiye aya ni Nlhuku. ¹⁶ Ukhalkhawaya attu vanolhupelha aya, anolhupelha wo nchina na ntu ri mulhupalhe naapwaha ni ulhupelha waya uwo uhimiecheshaka malhove onkhaye. ¹⁷ Nlhuku wo wooniha wiira khanorukunusha nlhove nawe mpaka vanotimira aya, ahokhomelhelha yayo malhehano ayo. ¹⁸ Paahi etu, malhove ari melhi ahinorukunuwa, malhehano ni ulhupelha, chihinooria urukunuwa ni mena Nlhuku hoothachaka vachulhu chechiyo chittu chiyo. Ni hii nittimakenlhe uri mpuhava, nihovahiya nrima wo ukhulhuvelha nlhove nishungiyi miholho.

¹⁹ Nenno phi nlhove ninovarelha ukumi ihu thoko iyuma inovarelha ikalhava wiira ihiverushiye. Nenno phi ichikurupi ihu yo ikekhiaye inoperetta nipaziya mpaka nipuro nitakatifu no wiirimu. ²⁰ Yesu mwanene honihelha wowo akhalhaka opochera ishaani olhupalhe o mahuku o uhimalha, munkutironi mwa opochera ishaani mwa Namelkisedeki.

7

Upochera ishaani u Namelkisedeki

¹ Namelkisedeki alha aari amwene o il-hapo yo Usalimu ni opochera ishaani a Nlhuku ri Mulhupalhe Chinene. Ikatema Aburahimu vaahokolhia aya ukhotoni waakottonhe aya mamwene acheshe yahaakumaanana Namelkisedeki ayo, Aburahimu nkayaavahiya ibarakha ni ayo. ² Aburahimu yahokumiha ni waavaha Namelkisedeki nifungu no khumi no nhakhu waya wonkhaye. Malhamulho o nchina Melkisedeki na amwene o Usalimu nno aari “Amwene o ikekhiaye.” Ni maana aya ikina ikhalhaka “Amwene o mpuha.” ³ Yayo Namelkisedeki ayo khanaromolhiya wiira athumwanaya ama anumwanaya ama manyaap-wiiya aya yaari apani mena nihuku naya no uyaria ama akhwilhe iyaakhani. Nansho anolhikaanihiya thoko Mwaana a Nlhuku, nokhalha opochera ishaani nkumi o mahuku o uhimalha.

⁴ Phi mwooneke vavawo chenre aya wo ukhalha ntu mulhupalhe, mpaka Aburahimu yahokumiha ni waavaha nifungu no khumi no nhakhu waapante aya ukhotoni. ⁵ Ni iyari yonkhaye i Nalawi iri ni ntheko wo upochera ishaani yahovahiya malheheriyo o upochera nifungu no khumi mwa attu, yaani ashilhoko aya, anakhalhaka wiira ni ayo yaari o iyari ya Aburahimu. ⁶ Nansho Namelkisedeki khayaari o iyari ya Nalawi, nansho yahopochera nifungu no khumi wa Aburahimu ni waavaha ibarakha ayo aalhehiye nlhove no uweherera ibarakha

ukhuma wa Nlhuku ayo. ⁷ Nansho khinthikineeha wiira, ntu naavaha ibarakha akina yoyo phi mulhupalhe waapwaha anovahiya ibarakha ayo. ⁸ Paahi etu opochera ishaani anopochera nifungu no khumi ayo attu, anookhwa, nansho Namelkisedeki anaachiya upochera nifungu no khumi ayo, akumi thoko Malhove Matakatifu chineera aya wo uhimiecheshiya wiira khanokhwa. ⁹ Nalawi yaari phi apwiya aya ayo o iyari ya opochera nifungu no khumi. Eiyo, vavawo nnoworia etu wiira ata Alawi ni ayo ahokumiha nifungu no khumi wo iphiro ya Aburahimu, ¹⁰ ukhalhawayaya inakhhalhaka Nalawi aari bado ahinayaria, nansho aari mphomeni mwa apwiya aya, Aburahimu, ikatema vaakumanne aya ni Namelkisedeki.

¹¹ Ntheko wo opochera ishaani waari phi nsingi wo Ikekchia yaavahiye aya attu o Israeli yaacha mwaha wo upochera ishaani. Paahi etu, yakhhalhaka ntheko wa Alawi uyo wahotimira, khawaakkhalha nlhatu nkhwawe tho wo ukhumelhelha opochera ishaani nkina nottwara nkutiro wa Namelkisedeki kuhii ulhe wa Naharuni ulhe. ¹² Ukhhalhawayaya ntheko wo upochera ishaani warukunuwaka, malhehero e Ikekchia o nlhatu wo upochera ishaani ni ayo arukunuweke. ¹³ Ni ayo Athithi, anaachiya mmalhoveni mu ayo, aari ntu o nikosho nikina, uhikhhalhaka ata ntu mmoka o nikosho naya aavanre ntheko wo opochera ishaani vamadhubahuni vaakumihiya isadaka. ¹⁴ Ukhhalhawayaya ninoona we ikekheni wiira, Athithi Yesu aakhumme nikosho ni Nayuda, nikosho na-

haromolhiye ni ashinna Musa voolhumacha aya mwaha wa opochera ishaani.

OPOCHERA ISHAANI AKINA MUNKUTIRONI MWA NAMELKISEDEKI

¹⁵ Ni nna nlhove nna vano phi no ikeekhene chinene, ukhalhawaya OPOCHERA ishaani nkina o ulhikaana ni NAMELKISEDEKI hokhumelhelha. ¹⁶ Yoyo khaavahiye ntheko wo upochera ishaani wo uttwara malheheriyo o attu o nikoshonikhumme awe, nansho wo ikuru yo ukumi wo mahuku o uhimalha. ¹⁷ Ukhallhawaya Malhove Matakatifu anohimiechesha wiira, “Inyuva phi OPOCHERA ishaani o mahuku o uhimalha thoko chaari aya wa opochera ishaani NAMELKISEDEKI.”

¹⁸ Paahi etu, malhehero o khalhayi alhe ahofutiya ukhalhawaya khayaari ni machiri, aari o uhilhoka ittu, ¹⁹ ukhalhawaya yayo Malhehero ayo khayaatimirinhe chittu chonkhaye. Nansho vano nihowihiya nlhove no ukhulhuvelhiya chinene. Ni wo nennenno nlhove nno ninowooria umwaatameria Nlhuku.

²⁰ Ni uthepa vavawo, vaa nihaawo nlhove naalhupenlhe awe Nlhuku. Ukhallhawaya akina ayo vaavahiya aya ntheko wo upochera ishaani yaavahiya wo uhilhupelhiya, ²¹ nansho vano, Yesu hokhalha OPOCHERA ishaani wo naapo na Nlhuku venre awe,

“Athithi aholhupelha, ni ayo khanorukunuwa,
Inyuva phi opochera ishaani o mahuku o uhimalha.”

²² Wo nennenno naapo nno etu, Yesu hokhalha phi neelheva uvarelhelha malhehano ihu orera chinene.

²³ Tho, yayo oPOCHERA ishaani ayo yaari enchi, ukhalhawaya kila mmoka nookhwa awe aayeke, ahokhwa wo uhimalhiha mitheko chaya. ²⁴ Nansho ukhalhawaya Yesu phiri nkumi wo mahuku o uhimalha, ntheko wawe wo upochera ishaani uri wo mahuku o uhimalha uhirwaaka wa ntu nkina. ²⁵ Ni uyo wo yoyo nlhatu uyo etu, nowooria woopolha kabisaattu anorwaa wa Nlhuku wo iphiro awe, ukhalhawaya ri nkumi mahuku o uhimalha aalhepelhelhaka wa Nlhuku.

²⁶ Ukhahawaya hii nahonthanana oPOCHERA ishaani olhupalhe o ukhulhuvelhiya thoko yoyo ri ntakatifu, hiwonnye, hinanarihiye, enanelhiye ni iphiro cha attu o uwonya, eenulhiye uchulhu wiirimu. ²⁷ Hinokhalha thoko oPOCHERA ishaani olhupalhe akina aathananiya ukumiha isadaka kila nihuku, anochokholha ukumiha isadaka cho milhatu chaya ashinene ni umalhihera wo uwonya wa attu akina. Yesu khanopanga chiicho ukhalhawaya ahomalhiha veekuminhe awe mwanene isadaka wa attu onkhaye nkwhaha mmoka ithoshaka wo ikatema choothe. ²⁸ Malhehero anaathanlha attu o uhuperia ukhalha oPOCHERA ishaani olhupalhe, nansho wo nlhove nilheehiye ni Nlhuku naatwanre kaanyuma baada yo Ikekhia nihommaha Mwaana timirihiye ukhalha OPOCHERA ishaani olhupalhe wo mahuku o uhimalha.

8

Nlhuku holheeha Malhehero o Naanano

¹ Nlhove ninohimiacha ihu phi nna, wiira nihanaa Opochera ishaani olhupalhe o yeo iphiro iyo, nokhalha wiimonono wo ihiche yo Nthimicho ya Nlhuku wiirimu, ² novara nthekeo wa Opochera ishaani Mulhupalhe va Nipuro Nitakatifu Chinene, va nihema no ikekhiaye nithekiye ni Athithi, nihithekiye ni attu.

³ Kila Opochera ishaani olhupalhe nothanlhiya apange nthekeo wo ukumiha izawadi ni ishaani wa Nlhuku. Ni Opochera ishaani olhupalhe ihu lazima ni uyo akhalhaneke ittu yo ukumiha chiicho. ⁴ Ikaari Kuristo aari o velhaponi va, kaakhalha oPOCHERA ishaani ata vakani, ukhalhawayaya ilhapo ihaana oPOCHERA ishaani anokumiha isadaka wo utwariha chilheheriye ni Malhehero a ashinna Musa. ⁵ Nthekeo unopanga aya wo upochera ishaani, phi iramani yo chittu chinopangiya wiirimu. Yayo anolhikaana thoko ashinna Musa vaatameria aya utheka nihema, Nlhuku venre awe, “Mmweheke rata, mwapangeke kila ittu thoko chenre aka wo uwoni-hani umwaakoni ulhe.” ⁶ Nansho vano Yesu hovahiya nthekeo wo ulhoka chinene upwaha wa oPOCHERA ishaani alhe, ukhalhawayaya vano yoyo phi o weewananiha malhehano arenree. Uno malhove ari nhina yayo malhehano ayo emelhelhaka nlhove nirenree na Nlhuku.

⁷ Ukhalihawayaya yakaari malhehano o upacha alhe khayaakhuwachiye, attu khaathananiya ukhalhana malhehano o nayelhi. ⁸ Nansho Nlhuku voonne awe attu ahotteka aamunke wo wiira,

“Mahuku anoowa aneera Athithi,

Vanohalha aka ulheha Malhehano o Naanano,
wa attu o inupa ya Israeli ni attu o Yuda.

⁹ Yayo malhehano ayo khanowa aalhikaana ni
malhehano alhehanne aka ni manyaapwi-
iya aya,

Nihuku vaavanre aka moono ni uwoopolha
ukhuma ilhapo yo Umisri.

Ukhalhawaya khayaavarelhenhe malhehano
alhe, paahi ni mii akaalhohilhe,

Athithi Nhuku phi noolhumacha yayo.

¹⁰ Ukhahawaya alha phi malhehano kinohalha
aka upanga wa attu o inupa yo Israeli.

Athithi aneera, baada yo yayo mahuku ayo,

Kinowa kaavaha Malhehero aka mmamirimani
mwaya,

Kinowa kaahelha mmamirimani mwaya.

Kinoowa kaakhalha Nhuku aya,

Ni ayo anowa ukhalha phi attu aka.

¹¹ Khaawo ntu nohalha mena weettuchiha achi-
hima we,

Ama weerelha alhoko awe,

Mwaachuwelheke Athithi.

Ukhalhawaya attu onkhaye, ashikaani mpaka
ashulhupalhe anowa aakichuwelha.

¹² Kinoowa kaahiyerera uhilhoka waya,

Mena akinowa koopuwelhaka tho uwonya
waya.”

¹³ Nhuku vaalhenhe awe Malhehano o Naanano,
Malhehano o Khalhayi ayo ahothalha. Ni ittu yo
khalhayi yathaahlaka, ihophiyelha vanorihiya
aya.

9

Ulhapelha wo velhaponi ni ulhapelha wo wir-imu

¹ Paahi etu ata malhehero o upacha ahaana iphiro cho uthimicha ni mapuro o unlhapelha Nlhuku cheeshiye ni attu. ² Nahothekiya nihema na Nlhuku. Ichuumba aya yo upachera yeehaniya Vakittu Vatakatifu, mweeshiye ikiango yo uthomeiya ikhandiri ni imeza ni mikatte chaakumihiye isadaka wa Nlhuku. ³ Vatulhi nipaziya no nayelhi nnihemani mmo yahaawo ichuumba ikina yeehaniya Nipuro Nitakatifu Chinene, ⁴ mwaari imeza yo idhahabu yo ukumihiyeriya ishaani yaatutumiheriya ubani. Tho nahokhalha nsanduku no Malhehano naashiringiye idhahabu kila mpatta. Nhina nsanduku mmo mwaahaawo iyoopwe yo idhahabu yaahelhiye yollhia yeehaniya mana, tho mwahaawo ntonto wa Naharuni waaphuwa mathaakhuru vachulhu ni ivibau cho malhuku chaalhepiye Malhove o Malhehano a Nlhuku. ⁵ Vachulhu nsanduku vawo ahaawo o wuupiya o mapupha elhi ooniha vari nthimicho wa Nlhuku, mapupha ayo aakhuneelha vachulhu vawo, vowoonelhiya ikiriri attu. Nansho vano kihii ikatema yo waandhandhulha chechiyo chittu chiyo.

⁶ Paahi etu chittu chiyo chamalheke weeshiya rata, o pocchera ishaani yahokelha kila nihuku munihema ni, va ichuumba yo upachera ilhe ni uvara nthecko waya. ⁷ Nansho o pocchera ishaani olhupalhe vekha aya phi aakhelha ichuumba yo nayelhi ilhe nkwha mmoka kila iyaakha. Ni ayo aathananiya urweha mwommo iphome yo

mwannama wo nlhatu wo uwonya waya ni wo milhatu cha attu aawonnye wo uhichuwelha.

⁸ Iphumu ya Nlhuku nonooniha wiira nihema no upacha nne vaari aya ninemenlhe, iphiro yo ukelha urii Nipuro Nitakatifu Chinene no wiirimu yaari bado ihinapatakulhiya. ⁹ Yayo phi malhikaanihero o ikatema yo naanano ahimiaka wiira isadaka ni ishaani chinokumihiya isadaka wa Nlhuku khachinooria waarulha attu misigo cho uwonya mmamirimani mwa attu anonthimicha Nlhuku. ¹⁰ Ukhalhawaya ulhia ni uwuria ni wihapiha iruttu, chinaacha mwaha wo mwiiruttuni. Chonkhaye chiyo chinotwara iphiro cho malhehero o chittu cho vatheru. Chechiyo chinoowa chaamalha Nlhuku vanohalha awe ulhokiha chittu chonkhaye.

¹¹ Nansho Kuristo wilhe ukhalha Opochera ishaani olhupalhe nowehaweha chittu choombone chipangelhe. Yoyo hokelha mu Nihema nulhupalhe no ukhulhuvelhiya chinene. Nihema nihithekiye ni attu, ukhalhawaya kanihiwe no velhaponi va. ¹² Kuristo aakenlhe Nipuro Nitakatifu Chinene munihemani mmo nkwhaha mmoka nakunshe kuhii iphome yo mwannama wiira akumihe isadaka, nansho aakunshe iphome awe mwanene nkaaniwihera o noopolha o mahuku o uhimalha. ¹³ Ukhalhawaya isadaka yo iphome yo ipuri ni yo ing'ope vamoka ni ituura yo mwang'ope vaamicheriye aya attu ananarihiye ni milhatu chaacha iphiro cho unthimicha Nlhuku, yahaahapiha milhatu chaya. ¹⁴ Paahi etu, iphome ya Kuristo ihanaa machiri chinene o unihapiha! Ukhalhawaya wo machiri o

Iphumu ya Nlhuku nolhokelha mahuku o uhimalha, Kuristo aheekumiha mwanene wa Nlhuku akhalhe isadaka itiminre. Ni iphome awe inoonihapiha mirima chihu cho uhlhoka chinommwiiha nookhwa, nikhalhe attu anovara nthekeo wa Nlhuku ri nkumi.

¹⁵ Wo yoyo nlhatu uyo etu, Kuristo phi o wiiwananiha o Malhehano o Naanano, wiira onkhaye aneehaniya apochere ibarakha cho mahuku o uhimalha. Ukhalhawaya nookhwa awe hokhalha phi noopo o woopolha attu uwonya waapannge aya ikatema yo Malhehano o Khalhayi.

¹⁶ Malhehano o uhiyeriya anotimira wo nlhatu wo uchuwania wiira ntu aalhenhe uyo hokhwa, ¹⁷ anopangia kaanyuma ntu aapanngé malhehano uyo nakhwilhe, kuhewe nari nkumi. ¹⁸ Chiichammo etu, malhehano o upacha ayo khayooria upanga nthekeo aya wo uhikhala isadaka yo iphome. ¹⁹ Ukhalhawaya, ashinna Musa aachokhonlhe wo waahimeria attu kila Malhehero yaavahiye aya ni Nlhuku. Kaanyuma nkayaakusha iphome yo mwang'ope ni yo ipuri nkayaathakanha ni maashi. Nkayaakusha machashi o hisopo ni mapururu o ukhwiilha o ikhondoro, nkayaamichamicha vachulhu ikitabu yo Malhehero ni waamichera attu onkhaye. ²⁰ Ni ayo nkayeera, "Ilha phi iphome inohimiechesha malhehano alhehanne inyu ni Nlhuku, nvarechesheke." ²¹ Wo iphiro thoko yevo, ashinna Musa ahomichamicha tho iphome vachulhu nihema ni vachulhu chittu cho nthekeo wo unlhapelha Nlhuku. ²² Eiyo, nhina Malhe-

hero ayo, kharibu chittu chonkhaye chinohapihiya wo isadaka yo iphome. Paahi etu vahirii iphome uwonya khunohiyereriya.

Ishaani yo iphome ya Kuristo phi nohapiha milhatu cho uwonya

²³ Chechiyo chittu chiyo phi malhikaaniho o chittu chiru wiirimu chiyo, chinothananiya uhapihiya wo iphiro yo iphome iyo. Nansho milhatu cho ikeekhene cho wiirimu chiyo chinohapihiya wo isadaka iri yoombone chinene upwaha chii. ²⁴ Ukhahawaya Kuristo khaakenlhe Vakittu Vatakatifu vaathekiye ni attu, vanolhikaanihiya ni nipuro no ikeekhene no wiirimu. Nansho aakhenlhe wiirimu unenene, uneemelha awe unilhapelhelha wa Nlhuku. ²⁵ Kuristo mena khaakenlhe wiirimu wiira ekumihe isadaka mwanene kila iyaakha, thoko Opochera ishaani Olhupalhe a Ayahudi chinokelha aya u Nipuro Nitakatifu kila iyaakha anakunshe iphome ihiri yawaya, ²⁶ ukhalhawaya yakeerelhe chiicho, Kuristo aanotwarushiya venchi toka wuupiya ilhapo. Nansho vano, mahuku vanaatameria aya umalha, hokhumelhelha nkwha mmoka tu, ekumihe iruttu awe mwanene akhalhe isadaka yo uhierera uwonya wa attu. ²⁷ Paahi etu thoko chiru aya, kila ntu nokhwa nkwha mmoka, baada yo vavawo neemelha uuhukumulhiyani ni Nlhuku. ²⁸ Chiichammo etu Kuristo aheekumiha isadaka mwanene akhwe vamoka wo nlhatu wo uhiereriya uwonya wa attu enchi. Ni uyo noohokolhia nkwha wo nayelhi,

uhikhalkhaka nkwha wo uhiyerera uwonya nan-sho uwaakushani alhe anomweherera chinene alhe.

10

¹ Paahi etu ukhalhawaya Malhehero a ashinna Musa phi irungu yo chittu choombone chinowa ukhumelhelha, ahilhikaanaka ni chittu chinene, chihooriaka waaratih attu anonthimicha Nlhuku wo isadaka chinokumihiya venchi kila iyaakha. ² Yakaari chiicho etu, isadaka khacheemelha ukumihiya? Chani attu anonthimicha Nlhuku ayo akaahapihiye uwonya waya wo yevo iphiro iyo, mirima chaya kha-choona wiira kharina milhatu cho ummwonya Nlhuku? ³ Nansho chechiyo isadaka chiyo chinokumihiya kila iyaakha wo upusha attu wiira ahowonya. ⁴ Ukhalkhawaya isadaka yo iphome cho ing'ope ni iphome yo ipuri khachinooria uhapiha milhatu cho uwonya.

⁵ Phi nlhatu etu, Kuristo vaawa awe velhaponi, ahomwiirelha Nlhuku,
“Inyu khamwaattunne isadaka mena ishaani ya ashinama,

Nansho nhokivaha iruttu ikhalhe isadaka.

⁶ Khamwaachivelhiye isadaka cha ashinama chinopahiya mooro mena
isadaka cho uthamiha milhatu cho uwonya.

⁷ Ni mii nkakeera, ‘Mii kiri vaa, kipange mat-tunelho ao Uwe Nlhuku,
Thoko Malhove Matakatifu chilhepilhe aya ukaacha mii.’ ”

⁸ Wo upachera Kuristo enre, “Khamwaattunne mena khamwaachivelhiye isadaka mena

ishaani mena isadaka cha ashinama chinopahiya mooro mena isadaka cho uhapiha milhatu cho uwonya.” olhumacha chiicho inakhalhaka isadaka chihimiye ni Malhehero a ashinna Musa, chaari chikumihiyaka. ⁹ Nkeera tho, “Mii kiri vaa, Uwe Nlhuku, kipange mattunelho ao.” Phi chiichammo etu Nlhuku ahothamiha isadaka cho upacha ni weesha isadaka yo nayelhi, isadaka ya Kuristo mwanene. ¹⁰ Ukhahawaya Yesu Kuristo ahopanga mattunelho a Nlhuku, hii vano nihohapihiya uwonya wihu wo iphiro yo ibarakha yo isadaka yo iruttu awe yaakuminhe awe nkwhaha mmoka tu.

¹¹ Kila oPOCHERA ishaani noovara nthekeo awe kila nihuku ni ukumiha isadaka chechiyo chechiyo venchi, isadaka chihinooria inakhalhaka vakani uhapiha milhatu cho uwonya. ¹² Nansho Kuristo ahokumiha nkwhaha mmoka isadaka yo uthamiha milhatu cho uwonya, isadaka yo ukhulhuvelhiya mahuku o uhimalha, amalhiheke nkaakhalha wiimonono wa Nlhuku. ¹³ Ni toka vavawo noweherera amalhaponi awe akottolhiye awe aanyikalhelha. ¹⁴ Ukhahawaya wo isadaka yeekuminhe awe nkwhaha mmoka, ahaathanha areerihiye alhe, anohapihiya milhatu chaya cho uwonya.

¹⁵ Ni Iphumu ya Nlhuku nohimiechesha chiicho veneera aya,

¹⁶ “Athithi aneera, Alha phi malhehano kinohalha aka waalhehana mahuku anowa, Kinowaahelha Malhehero aka mmamirimani mwaya,

Ni ulhepa mwiirushoni mwaya.”

¹⁷ Ni ayo nkayoncherera wiira,
“Ni mii akinoopuwelha tho uwonya waya
Mena uhilhoka waya.”

¹⁸ Paahi etu milhatu cho uwonya vanothamihiya aya, khuuwo tho mwaha wo ukumihiya isadaka yo nlhatu wo uhiyereriya uwonya.

Nimwaatamerieke Nlhuku

¹⁹ Haya etu ashilhoko aka, nihanaa nikhulhuvelho no ukelha uri Nipuro Nitakatifu Chinene wo iphiro yo iphome ya Yesu, ²⁰ wo iphiro yo ulhoka inihulhenlhe awe, inoniholhelha urii ukumi, vari nipaziya nulhupalhe, yaani iruttu awe mwanene. ²¹ Ni ukhalhawaya nihanaa Opochera ishaani Mulhupalhe neemelhelha inupa yonkhaye ya Nlhuku, ²² paahi etu nimwaatamerieke Nlhuku wo nrima woombone, wo nrima wo ikekhiaye uratihiye wiira nihiyi iphiro cho unanara ni wo iruttu chihapihiye wo maashi oombone. ²³ Nithepeke etu uvarelhelha nikhulhuvelho ninorumelhelha ihu wo uhoova, ukhalhawaya Nlhuku lhehilhe ri o ukhulhuvelhiya. ²⁴ Tho, nikavihaneke hii naashineneru ni wooniha nrima wo uttunana ni upanga mitheko choombone. ²⁵ Nihoochee mena nihiyi mwaha wo ukumaanacha vamoka thoko chineera aya attu akina. Nithepeke uhelhana mirima uno nichuwelhaka wiira nihuku na Athithi nihaatameria.

²⁶ Nichuwelheke etu wiira, nawonyaka mweni ninachuwenlhe ikekjhene, khiiwo isadaka ikina tho inohalha ukumihiya wo nlhatu wo uhiyereriya uwonya wihu. ²⁷ Ittu ihanlhe vavawo iri uweherera noovaka uhukumulhiya

ni upahiya mooro wo uviha unohalha waapaha attu onkhaye anonkhota Nlhuku.²⁸ Ntu riyoothe nokhota urumelhelha Malhehero a Nlhuku aavahilhe awe ashinna Musa nowiiviya wo uhoonelhiya ikiriri, yahimiecheshiyaka ni attu elhi ama araru.²⁹ Ntu nonheulhacha Mwaana a Nlhuku ni uheulhacha iphome yo Malhehano a Nlhuku inlhokihilhe ama ntu nonruwana Iphumu ya Nlhuku nonivaha mahalha o ibarakha, yoyo nootwarushiya ntwarusho wo uvirelhelha chinene.³⁰ Ukhahlawayaya nihonchuwelha himilhe, “Ulhivelhelhiha phi wawaka, Mii kinoolhivelhelhiha.” Eeraka tho vakittu vakina, “Athithi anowaahukumulha attu aya.”³¹ Iri ittu yo woopiha chinene, uvariya ni Nlhuku ri nkumi wiira o uhukumulheni!

³² Nansho muupuwelheke mahuku avinre vaamwalhelhiye inyu nthuko ni Nlhuku, vaatwaruwa inyu chinene, nansho mwahovilhelha ntwarusho nulhupalhe nno. ³³ Nkwaha nkina mwahoruwaniya ni uhambulhachiya mwaattuni. Ni ikatema ikina vaakavihanne inyu ni attu aapangelhachiya thoko chiicho. ³⁴ Ukhahlawayaya mwahooneleha ikiriri chinene attu attukiye vamoka ni inyu, vaathurulhiye inyu mihakhu chinyu mwahorumelhelha wo nrimal woombone, nchuwelhaka wiira, nhanaa nhakhu woombone chinene uhimmalha. ³⁵ Paahi etu nhikhwe nrimal, nnoowa mwaattuviya nttuovo nulhupalhe. ³⁶ Mvilhelheke, mmwe mwaatimiria uttuna wa Nlhuku, mmwe mwaavahiyaa yaalhehiye inyu. ³⁷ Kwaani Malhove Matakatifu aneera,

“Mahuku ahanlhe vakani chinene,

Nowehereriya uwa, noowa,
Ni uyo khanocherewa.”

³⁸ “Nansho attu aka anovarechesha ikekchia,
Yayo anookhalha akumi ukhalhawaya
anokirumelhelha,
Nansho yarukunuwaka,
Akinowa kaateelhiya nrima.”

³⁹ Paahi etu, hii kanihii attu o urukunuwacha
utulhi ni upotera, nansho hii phi attu anopisha
nrima, ni woopolhiya.

11

Upisha nrima

¹ Paahi etu upisha nrima phi ukhalha ni ichikurupi yo ikekhiaye yo chittu chinoweherera ihu ni urumelhelha chittu chihinapatta ihu woona.

² Ukhahawaya wo upisha waya nrima ashulhupalhe ihu ahohimiecheshiya chinene ni Nlhuku.

³ Wo upisha nrima nihochuwelha wiira ilhapo
yo upiye wo nlhove na Nlhuku ni chittu chinoona
ihu chi chuupiye ukhuma wo chittu chihinoonia.

⁴ Wo upisha nrima Habilu ahommaha Nlhuku
isadaka yoombone upwaha ilhe yaakuminhe
awe Kaini. Paahi wo upisha nrima wawe
etu ahaalhakelhiya ni Nlhuku wiira aari ntu e
ikekhiaye. Ni wo upisha nrima uwo, Habilu
noniittuchiha inakhalhaka ahomalha ukhwa.

⁵ Wo upisha nrima, Nahenoko khaakhwilhe
aahowiraka ukushiya wiirimu wo uhooniya ni
ntu, Nlhuku mwanene phi akunshe. Thoko
Malhove Matakatifu chinohimiechesha aya wiira
ahinaya ukushiya, aari ntu antelhihilhe Nlhuku.

⁶ Paahi etu vahiri upisha nrima khavanooria

unteelhiha Nlhuku, ukhalhawayu ntu nowa wa Nlhuku nothananiya urumelhelha wiira Nlhuku haawo ni urumelhelha wiira nowaattuva attu anomwaavia wo uminda.

⁷ Wo upisha nrima, Anuhu ahomwiiwelhelha Nlhuku vaahimeriye aya mwaha unohalha ukhumelhelha kaanyuma, chittu chihinapacha aya woona. Nkayaakoorosha isafina, ikalhava yulhupalhe yo wookholha anene ayo ni inupa aya. Wo wowo upisha nrima waya uwo ilhapo yahohukumulhiya, Anuhu nkayaapochera ikekhiaye inopattiya wo upisha nrima.

⁸ Wo upisha nrima, Aburahimu ahonrumelhelha Nlhuku veehaniye aya wiira arwee ilhapo yaalhehiye aya ni Nlhuku wiira anoovahiya ukhalha yawaya. Ahohiya ilhapo aya ahichuwelhaka ukittu unokelha aya. ⁹ Wo upisha nrima, Aburahimu ahokhalha ulhetoni wi ilhapo yaalhehiye aya ni Nlhuku mwanene. Aakhanlhe wowo munihemani vamoka ni Naisaka ni Nayakhobo, yaalhehiye nanaya malhehano a Nlhuku ayo. ¹⁰ Ukhalhawayu Aburahimu aari awehereraka woona iwani yo nsingi wo ulhama mahuku o uhimalha, yaalhakelhiye ni uthekiya ni Nlhuku mwanene.

¹¹ Wo nrima wo ukhulhuvelha Aburahimu inakhalkaka aari ntu o wuulhuvalha ni Asara ahanu aya akhalhaka o uhiyara, ahovaheriya wooria waayara ashaana ukhalhawayu ahorumelhelha wiira Nlhuku nootimiriha malhehano awe. ¹² Paahi etu ukhuma wa ntu mmoka, Aburahimu, aari thoko ntu khwilhe, ahoyaria attu enchi ahinooriya waalhakelhiya

thoko ittotwa wiirimu ama thoko nhaava wo uchereshere ibahari.

¹³ Yalha attu onkhaye alha yaakhwilhe anari attu o upisha nrima ahinaya upochera ittu yaal-hehiye aya ni Nlhuku. Nansho yahooona utayi, nkayaarumelhelha wiira yaari attu o uvira vel-haponi va. ¹⁴ Ukhalhawaya attu anoolhumacha malhove thoko alha, anowooniha wiira anaavi-acha ilhapo ye ikeekhene. ¹⁵ Yakoopuwenlhe ilhapo yaakhumilhe aya, yaanooria uhokolhi-acha. ¹⁶ Nansho vano anothanana ilhapo yorera chinene, ilhapo yo wiirimu. Paahi etu Nlhuku khanoona ishoni wiihaniya Nlhuku aya, ukhalh-awaya heeshera iwani aya.

¹⁷ Wo upisha nrima Aburahimu ahorumelhelha unkumiha isadaka Isaka mwaamwanaya o vekha awe, ikatema vaalhikachiye aya ni Nlhuku. Yayo phi ayo aapochenre malhehano a Nlhuku, nansho ata inakhalkaka chiicho, ahorumelhelha unkumiha isadaka mwaamwanaya o vekha awe. ¹⁸ Ukhalhawaya Nlhuku ahoolhumacha wiira, “Iyari inohalha wiihaniya wo nchina ninyu, inowa ukhuma wa Isaka.” ¹⁹ Aburahimu ahorumelhelha wo uchuwelha wiira, Nlhuku nowooria waahihimusha attu akhwilhe. Ni wo nlhikaaniho nno etu Aburahimu ahompatta mwaamwanaya Isaka tho, thoko nokhuma unookhwani.

²⁰ Wo upisha nrima, Naisaka ahaavaha ibarakha Nayakhobo ni Naesau, wo chittu chinohalha uwa kaanyuma. ²¹ Wo upisha nrima Nayakhobo vaakhwa aya ahaavaha ibarakha

ashaana a Nayusufu kila mmoka. Nkayan-thimicha Nlhuku yooromelhaka vachulhu ikopo aya.

²² Wo upisha nrima, Nayusufu vaari aya amwaatameriaka nookhwa, ahoromolha mwaha wo uthama ashaana a Israeli ukhuma Umisri, ni ulhehera mwaha wo ushungiya makhuba aya.

²³ Wo upisha nrima, manyanaangoro a ashinna Musa yahonvitha mwaamwanaya wo mieri miraru toka vaayarelhe awe, ukhalhawaya yahomwoona wiira aari mwaana o urera chinene, khayoovilhe malhehero a Nafaraao amwene o Umisri. ²⁴ Wo upisha nrima, ashinna Musa vonnuwilhe aya yahokhota wihaniya mwaana a abiti Farao. ²⁵ Nkayoona mbaya uhuva vamoka ni attu a Nlhuku kuliko wiipuhiha mu uwonyani wo mahuku vakani, ²⁶ yaalhakelhaka wiira uruwaniya wa Kuristo Moopolhi phi nhakhu mulhupalhe upwaha mihakhu cho Umisri, ukhalhawaya yaari akhulhuvelhaka nttuvo naya no mahuku anowa. ²⁷ Wo upisha nrima ahothama Umisri ahoovaka urushiya wa amwene ukhalhawaya yaari ankhulhuvelhaka Nlhuku hinoonia uyo. ²⁸ Wo upisha nrima ahonchokolhiha Pasaka ni aholheehera umichamichiya iphome vachulhu milhako wiira nnepa uneeva attu uyo uhaavare ashaana o ntara a Aisraeli. ²⁹ Wo upisha nrima Aisraeli yahoviracha variyari ibahari yo Shamu thoko chinovira aya vakittu voomilhe. Attu o Umisri vaalhikanche aya waattwara, yahotitimira onkhaye mmaashini nkayaakhwacha.

30 Wo upisha nrima, Aisraeli ahorukureria ishiri yaarukureria iwani yo Uyeriko wo mahuku saba. Vaamanlhinhe aya urukureria, ishiri yahowulhuwa. ³¹ Wo upisha nrima Narahabu, opa ni o ulhavalhava alhe, aholhama khayee-viye vamoka ni attu anrunne Nlhuku alhe, wo nlhatu wo waapochera rata attu o uhotelha o mpuha, a Aisraeli alhe. ³² Vano mii kiirekeni etu, ukhalhawaya nipesha nna khaninokithosha uuhimeriachani mwaha wa Nagidioni ni mwaha wa Nabaraki ni mwaha wa Nasamsoni ni mwaha wa Nayefta ni mwaha wa Adaudi ni mwaha wa Nasamweli ni mwaha wa anamilhohi, ³³ yayo phi attu yanrumelhenlhe Nlhuku wo upisha nrima nkayaatakana ikhoto ni waakottolha mamwene, nkayaatawara wo iphiro chaholhenlhe attu aware chaahimiya ni ikekchia, nkayaapochera yaalhehiye aya ni Nlhuku. Nkayaattuka iyano cha akharamu, ³⁴ nkayaatipiha mioro cho uviha, nkayookokwaa wo uhithuriya uphangwa wo wiithia. Vaahupenrie aya yahohelhiya machiri, nkayaalhipa vaatakana aya ikhoto, nkayaatopora mphingo wo manyaasikari wa amalhaponi.

35 Wo upisha nrima manyopani yanrumelhenlhe Nlhuku yahopochera mitembo cha ashilhoko aya akhwilhe chinahihimushiye nansho akina yahohuva mpaka ukhwa ahittunaka woopolhiya wiira ahihimushiye ni ukelha mu ukumi wo urera chinene, ³⁶ akina yaholhikachiya wo nihambu ni waatiya mikwaju, akina ahottukiya mittondoro ni utikhelhiya ujerani. ³⁷ Akina yahokhwa wo waatakachiya malhuku mpaka ukhwa ni akina yahomianihachiya velhi wo

nsumeno ni akina yaheevakachiya wo uphang'a. Nkayaarukureriacha uwo ni uwo anawanre marapalha o ikhondoro ni marapalha o ipuri, yaari attu amashikini, yaatwarushachiye ni up-angelhiya chittu cho uhilhoka. ³⁸ Yayo attu ayo yaari attu yankhulhuvenlhe Nlhuku. Nansho attu o ilhapo ilha yaari o uhilhoka chinene, ata nkayoonia khaphwanelhiye ukhalhana attu thoko yayo. Yayo attu yanrumelhenlhe Nlhuku ayo yaakukuriacha nthakhwani ni mmiakoni, akhalhachaka mmakhukuni ni nhina malhikit'i o velhaponi.

³⁹ Yayo attu onkhaye ayo ahohimiecheshiya ni Nlhuku wo nlhatu wo upisha nrima waya. Nansho inakhalkaka chiicho, khayaapochenre alhe yaalhehiye aya ni Nlhuku alhe, ⁴⁰ ukhalhawaya Nlhuku ahoneeshera chittu choombone chinene. Aalhakenlhe wiira ayo aphiyalhe utimira waya anari vamoka ni hii.

12

Nlhuku Athumwanihu noonokolha

¹ Paahi ni hii ukhalhawaya nihorukureriya ni nlhoko mulhupalhe wa attu o unihimiechesha, niriheke utayi etu misigo chonkhaye chirina ihu ni uwonya unionikhanyerera. Vanottimakacha ihu uttimakelha mmiholho weesheriye ihu, nittimakacheke wo ukuruvalhelha. ² Nimmwehechesheke Yesu wo miitho melhi, chokholhinhe ni utimiriba upisha nrima wihi. Wo nlhatu wo mpuha unohalha awe upatta ahovilhelha ukhwa vansalaabani wo uhilhoha wuulhihiya muru. Ni uyo vano hokhalha va

nipuro no nthimicho, wiimonono wo ihiche yo Imwene ya Nlhuku.

³ Paahi etu mmuupuwelheke Yesu chenre awe wo uvilhelha upangelhiya ichimwa ni attu o uwonya, vano etu nhoochee ni ukhwa mirima chinyu. ⁴ Mwaatti khannaatakana ikhoto yo waatakana ni uwonya mpaka nkamwaariha iphome. ⁵ Tho, nholhiyalha malhove o waamukiya, Nlhuku vanoromolha awe wiira mwaatti phi achishaana awe? Vaneera awe “Mwaamwanaka, uhiheulhache vanaamukiya ao ni Athithi.

Mena, uhimondhe nrima Athithi vanowookollaaweni.

⁶ Ukhahawaya Nlhuku Athithi anoomwaamuka ntu riyoothe nonttuna awe,
Noomwookolha kila ntu norumelhelha wiira phi mwaamwanawe.”

⁷ Nvilhelheke vanookolhiya inyu, ukhalhawaya Nlhuku nowookolhani thoko achishaana awe. Mwaana ani hinookolhiya ni athumwanawewe?

⁸ Nansho mwaahikavihiyeke wo wookolhiya ni Nlhuku thoko chinookolha awe achishaana awe, inyu vano kanhii achishaana awe nansho ashaana o mwiithuphini. ⁹ Wo uthepa vavawo naahaanaa manyaathumwanihu o velhaponi, attu yaanamuka, nkaneewelhelha, chani vanorika vayi weewelhelha Athumwanihu o munnepani wiira nipatte ukumi? ¹⁰ Manyaathumwanihu o velhaponi anaamunke wo mahuku vakani thoko choona aya wiira vaholhoka. Nansho Nlhuku nonaamuka wo unookolha wiira nikhalhe mu utakatifu awe. ¹¹ Nansho vanookolhiya ihm,

ninoorushiya ni uhiteelhiya nrima, nansho mmi-holho uwo attu onkhaye aamukiye wo yoyo ntwarusho uyo anoottuviya nttuvo no ikekhiaye no mpuha.

Ikano ni waamukiya

¹² Paahi etu, nlhipiheke miono chinyu chiririilhe ni ulhipiha makutha inyu aririilhe.

¹³ Nthepeke wookokolha mitalha, nnyaa niremanre nihithepe uwereehiya nansho nilhameke.

¹⁴ Mwiimindiheke wo kila iphiro ukhalha wo mpuha ni attu onkhaye. Nkhalhacheke makhahelho matakatifu, ukhalhawaya khaawo ntu nohalha woona Athithi wo uhikhala chechiyo iphiro chiyo. ¹⁵ Mwiishungeke chinene ntu riyoote hiwe aawukuwelhiya nnema wa Nlhuku, hiwe aakhalha thoko mwiri wo uwawa unomelha ni wunnuwa nkawaananariha attu enchi. ¹⁶ Tho, hikhalhe ntu o ishembwere munlhokoni mwinyu ama ntu o unanara nrima hinomwoova Nlhuku thoko Naesau, aathuminhe ibarakha aya yo ukhalha mwaana o nttara wo nlhatu wo yolhia yo nkwhaha mmoka. ¹⁷ Ni inyu nhochuwelha wiira kaanyuma vaathanana aya upochera ibarakha iyo ahokhotelhiya. Khayaarina tho iphiro yo ukhoroma inakhalhaka yaari onlhaka.

¹⁸ Mwaatti khamwaaphilhe umwaakoni Usinai thoko Aisraeli chenre aya wo uphiya, mwaako unooria uvariya, mwaako waapharelha mooro, mwaako waakhuneelhiye ni ipiphi, waarama iphoo yo machiri, ¹⁹ weewania nipalhapata ni

malhove. Attu veewilhe aya nlhove nno, ya-holhepelha apepechaka wiira ahiiwe tho nlhove nikina, ²⁰ ukhalhawaya khayoonrie uvilhelha nlhove naahimeriye aya wiira, “Ata mwannama anyikalhaka mwaako uyo, noowonyeriya mal-huku, wiiviya.” ²¹ Ni yayo onkhaye ayo yaari o woopiha chinene mpaka ashinna Musa aheera, “Kinowoova chinene ni uthukumelha!”

²² Nansho mwaatti nhophiya umwaakoni Us-ayuni, iwani ya Nlhuku nkumi, Yerusalemu yo wiirimu, uri minepa maelufu menchi athukumanne wo mpuha. ²³ Mwaattiva nhophiya unothukumana aya wo mpuha alhe aneehaniya o ntara a Nlhuku alhe, alhephiye machina aya wiirimu wa Nlhuku, naahukumulha attu onkhaye, ni minepa cha attu aalhakelhiye ikekchia ni Nlhuku. ²⁴ Nhophiya wa Yesu o waathaniha o Mal-hehano o Naanano, o iphome awe yaamichiye, inoolhumacha malhove o urera upwaha iphome ya Habilu.

²⁵ Paahi etu, mwiishungeke rata nhikhote umwiwelhelha noolhumacha ni inyu uyo thoko ayo aakhonte umwiwelhelha vaamuka awe vel-haponi va, yayo khayaakulhuphuwilhe. Ni hii ninohalha ukulhuphuwa chani uno nihimwiwelhelhaka yoyo nonaamuka ukhuma wiirimu uyo? ²⁶ Nlhave nawe nahotikhinya ilhapo yeo ikatema iyo, nansho vano holheha tho wiira, “Kinootikhinya ilhapo tho nkwhaha mmoka, nansho kuhii ilhapo vekha ayaru, nansho ni irimu ni iyo.” ²⁷ Nenna nlhave nna, “nkwhaha mmoka tho”, ninwooniha mwaari wiira chittu chinotikhinyia chinowa utikhinyia ni uthami-

hiya, nansho chuupiye chihinotikhinyiya chiyo chiwe chaahalha.

²⁸ Paahi ukhalhawaya ninoopochera imwene ihinotikhinyia, ninshukuruku Nlhuku etu, ninthimicheke ni unteelhiha ni wiitimarikha ni umwoova. ²⁹ Ukhahawaya we ikekhiaye, “Nlhuku ihm phi mooro umpaha.”

13

Iphiro cho unteelhiha Nlhuku

¹ Nthepiheke uttunana ni ashilhoko inyu.

² Nhilhiyalhe waapochera alheto, ukhalhawaya wo upanga chiicho ahaawo attu akina yaapochenre minepa wo uhichuwelha.

³ Mwoopuwelheke attu attukiye, mwiichonaka wiira ni inyu nri muuttukiyani vamoka ni ayo. Mwoopuwelheke attu anohuva, mwiichonaka wiira ni inyu nnohuva mwiiruttuni vamoka ni ayo.

⁴ Nthelhi ninthimichiyeke ni attu onkhaye, manyottato ni manyopani ahinanarihe nthelhi naya, ukhalhawaya Nlhuku noowa waahuku-mulha attu anopanga ishembwere ni attu o ulhavalhava.

⁵ Nhikhalhe attu o nlhulha wo uchiviya nchurukhu chinene, nthoshekeke ni chittu chirina inyu, ukhalhawaya Nlhuku mwanene heera, “Akinoulhiyalhani, mena akinouhiyani.” ⁶ Phi vavawo etu vanominda ihm niiraka, “Athithi phi naakhulhuvelha aka, Akinoova ittu. Ntu nohalha ukipanga ittu yaani?”

⁷ Mwoopuwelheke aholhelhi inyu o wiittuchi-hilheni nlhove na Nlhuku. Mmweheke chenre aya wo ukhalha ni ukhwa, ntvariheke meetelho aya, chenre aya wo upisha nrima. ⁸ Yesu Kuristo phi yoyoyo, nchana ni lhelho mpaka mahuku o uhimalha. ⁹ Nnikukureerihiye ni meettuchiho makina e ilheto. Nnema wa Nlhuku phi nonihelha machiri mminepani mwihu, mena kuhiwe ikano cho chittu cho muulhiyani. Ukhawaya attuaatwanre chechiyo mirima chiyo, khayaapantte ifaida iriyoothe.

¹⁰ Hii nihanaa imeza yo ukumiheriya isadaka, ni ayo anovara ntheko unihemani uwo, kharina ikuru yo ulhia chittu chinokumihiya isadaka umadhubahuni. ¹¹ Opochera ishaani Olhupalhe anoorweha iphome ya ashinama u Inupa Itakatifu ukhalha isadaka yo uhiyereriya uwonya, nansho iruttu chinohalha chiyo chinopahiya vamooroni uchereshere ikambi. ¹² Phi nlhatu etu, Yesu ni uyo ahotwarushiya nkaakhwa uchereshere iwani wo nlhatu wo waahapiha attu uwonya waya wo iphome awe mwanene. ¹³ Paahi etu nihoove, nkanngwe nintware uchereshere ikambi uri awe uwo ni hii nahambulhiye thoko chenre awe wo uhambulhiya. ¹⁴ Ukhawaya velhaponi va khanirina iwani inooria yo mahuku o uhimalha, nansho ninaavia iwani inowa iyo. ¹⁵ Vano etu, wo iphiro ya Yesu, nngwe nikumihe isadaka cho unthimicha Nlhuku mahuku onkhaye, yaani malhove o untotopelha kila vanorumelhelha ihu nchina nawe. ¹⁶ Nhiliyalhe upanga moombone ni ukhalha nlhoko mmoka, ukhalhawaya isadaka

thoko chechiyo phi nonteelhiha Nlhuku.

¹⁷ Mweewelhelheke aholhelhi inyu ni uvara chinolhehera aya, ukhalhawaya yayo phi noshiha uthana ni uhiyu, ushunga minepa chinyu. Ni ayo phi nohalha urweeha malhove anaacha mitheko chaya mmiholho wa Nlhuku. Mweewelhelhaka, anooteelhiya vanovara aya mitheko chaya, khanowoonani thoko nsigo. Mwaahipangeke chiicho, anoochukulhacha, khannowa mwaapatta ifaida iriyoothe.

¹⁸ Nnilhapelhelheke ni hii. Nihochuwelha wiira mirima chihu khachinonihimeria wiira nihotteka. Ukhalhawaya nihanaa nrimsa wo uthanana meetelho moombone ikatema chonkhaye. ¹⁹ Kinoulhapelhelhani wiira nkilhapelhelheke wa Nlhuku, akihokolhoshe uwaninyu mwaatti chitema.

Ulhepelha wo umalhihera ni isalamu

²⁰ Nlhuku o mpuha, aahihimushilhe Athithi Yesu Nshunga Mulhupalhe o ikhondoro, wo iphome aya yo malhehano o mahuku o uhimalha, ²¹ kinonlhapelha otimiriheni mu kila ittu yoombone inopanga inyu, wiira ntimirihaka mattunelho awe ni uyo atimirihaka inonteelhiha nhina mwihi wo iphiro ya Yesu Kuristo. Nthimicho ukhalhe wa Yesu Kuristo mahuku o uhimalha. Aye.

²² Ashilhoko aka, kinoulhepelhani, mpochereke wo wiitimarikha alha malhove o uhelhani nrimsa kilhepilhe aka wo makhuvi nhina iwarakha alha. ²³ Kinothanana nchuwelhe wiira munnihi, Natimotheo ahothaphulhiya.

Aakuviaka uwa uno kinowaattukana vamoka niwe no ushikuriani.

²⁴ Mwaavaheke isalamu chihu aholhelhi inyu onkhaye ni attu awe Nlhuku onkhaye. Ashilhoko ihu akhumme ilhapo yo Uitaliya anouvahani isalamu chaya.

²⁵ Ninoulhapelhelhani nnema wa Nlhuku ukhalhe vamoka ni inyu mwaatti onkhaye.

**Makua New Testament 2015
Makhuwa-Meetto: Makua New Testament 2015 New
Testament**

copyright © 2016 The Word for the World International

Language: Makhuwa-Meetto

Contributor: The Word For The World

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-11-11

PDF generated using Haiola and XeLaTeX on 11 Nov 2022 from source files dated 29 Jan 2022

87ae4d2f-90f6-5bdd-b41e-00464a1ad514